

Naqqiut

Siunnersuut 15. august 2019-imeersoq taarserpaa

Tunggavilersuut

Saqqummiussissummi oqaatsinik iluarsiiisoqarpoq.

Uunga siunnersuut: Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. xx, xx. xxx 2019-imeersoq

(Aatsitassanut Suliffeqarnermullu Naalackersuisoq)

Saqqummiussissut

Siullermeerneqarnera

Naalackersuisut sinnerlugit matumuuna ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisissaattut siunnersuut saqqummiunneqassaaq.

Siunnersuummut siunertaavoq inuusuttortatta amerlanerusut inuussutissarsiutini ilinniartitaanerni ilinniartutut imaluunniit sungiusartussatut aallartinnissamut akuerineqartarnissaat aammalu ammuinnaq ingerlasoqarnera ukiuni kingulliunerusuni misigisatta mumisinnissaa. Tamanna Naalackersuisut Ilinniarnissamut qinnuteqartunut ilinniarfissat sungiusarfissallu inuttaqanngitsut pitsaanerusumik paasissutissiissutigisalerneerisigut aammalu oqartussat aamma suliffeqarfiit ilinniartunik aamma sungiusartussanik atorfinitsitsiniartarneranni aporfiusartut annertuut ingerlaavartumik ersarissuutittarnerisigut pilersinniarpaat. Naalackersuisut inatsisissatut siunnersuut saqqummiunneqarnera peqatigalugu ilinniarfissanik amigarneq pinngitsoorniarlugu kigaallassaataaffissat qulaarniarpaat, ilaatigut ilinniartut inissaanik sanaartorneq aqutigalugu.

Siunnersuut malillugu oqartussat imaluunniit suliffeqarfik ilinniagaqarsimasumik ataatsimik arlalinnilluunniit sulisoqartut, ilinniartoqartussatut imaluunniit sungiusartoqartussatut akuerineqarnissamut, ilinniarfimmuut attuumassuteqartumut attaveqarnissamik pisussaaffeqarpoq. Tulliullugu oqartussat aamma suliffeqarfiit, ilinniartoqarnissamut aamma sungiusartoqarnissamut akuerineqarsimagunik, ilinniartumik aamma sungiusartumik atorfinitsitsinissamik pisussaaffeqarput.

Oqartussat aamma suliffeqarfiit tassunga atatillugu ilinniarfissat aamma sungiusarfissat inuttaqanngitsut amerlassusaasa Naalackersuisut suliffissanut nittartagaanni, www.suli.gl

imi, elektroniskimik immersugassaq pisariitsoq immersorlugu, nalunaarsornissaanut pisussaaffeqarput. Oqartussap imaluunniit suliffeqarfiup ingerlaneranut tunngasut suli ilinniartoqarnissamut imaluunniit sungiusartoqarnissamut akuersissutip annertussusaanut naapertuuttut suli isigineqartut, ukiumoortumik nalunaarsorneqarnermi uppersarneqartassaaq.

Siunnersuummi ”malinnaanermut imaluunniit nassuiaanermut tunngaviusoq” tunngavigineqarpoq, tassani sulisitsisup ilinniarfissat sungiusarfissallu inuttaqanngitsut paasissutissiissutiginnissaanut kajumissuseqalersinnissaa aammalu ilinniartussanik sungiusartussanillu eqeersimaartumik ujaasinissaat qulakkeerneqassalluni. Oqartussap imaluunniit suliffeqarfiup ilinniartunik imaluunniit sungiusartussanik atorfinitsitsinissamik pisussaaffeqartup pisussaaffini naammassisinnaanngippagu, ilinniartunut imaluunniit sungiusartunut atorfinitsittussaagaluakkaminnut, kisianni atorfinitsissimanngisaminnut ataasiakkaanut tamaginnut pissutaasoq nassuiarneqassaaq.

Oqartussap imaluunniit suliffeqarfiup ilinniartunik imaluunniit sungiusartunik pisussaaffigineqartut amerlassusilinnik sooq atorfinitsitsisimannginneranut nassuiaat, Naalackersuisut suliffissanut nittartagaanni, www.suli.gl-imi, elektroniskimik immersugassaq pisariitsoq immersorlugu allanneqassaaq, taannalu tamanit pissarsiarineqarsinnaasunngortinneqassalluni. Taamaaliornikkut inuussutissarsiutinut ilinniartitaanerni ilinniartunik sungiusartussanillu amerlanerusunik tiguisoqarsinnaannginneranut suut pissutaanersut ingerlaavartumik paasisimaarineqarnissaat qulakkeerneqassaaq, siunnerfilimmik suliniuteqarnissaq ajornarunnaarsinneqassalluni. Siunnersuutip atuutilernerani uuttuutissamik atuutsitsilertoqarsinnaavoq, assersuutigalugu smiley atorlugit aaqquussinertut ilusilimmik, oqartussat imaluunniit suliffeqarfiit ilinniartunik sungiusartussanillu atorfinitsitsinermi inuiaqatigiinni akisussaassuseqarnermut peqataanerat erseqqissarneqarluni.

Tamatuma saniatigut inuit ilinniartitaanermi aallartinnissamut akuersaasimasut aammalu ilinniarfissamik imaluunniit sungiusarfissamik amigaaqartut www.suli.gl-imi CV-p immersornissaanut pisussaaffilerneqarput. Siunnersuut malillugu oqartussat aamma suliffeqarfiit Naalackersuisut nittartagaanni atorfiit allagarsiissutiginerisigut ilinniartussanik sungiusartussanillu iliuseqarlutik pissarsiussapput. Tamanna pingaartumik inuussuttunut nunatsinni ilinniartut imaluunniit sungiusartussat qinnuteqarnissamut pitsaannerusunik periarfissaqalersitsissaaq aammalu suliffissani tamaginni ilinniartoqarnissamut aamma sungiusartoqarnissamut inissat atorneqanngitsut atorneqalissallutik.

Taamatut aallarniutaasumik oqaaseqarlunga siunnersuut Inatsisartunut kajumittumik suliassanngortippara.